

## Mál nr. 5. 2007/2008

### Kærandi:

Rannveig Rist.

### Kærður:

Þórður Snær Júlíusson, fyrrverandi blaðamaður Fréttablaðsins og núverandi blaðamaður 24 stunda.

### Kæruefni:

Kærð er umfjöllun kærðs um kæranda á vefsíðu hans <http://thessarelskur.blogspot.com> og birtist þar 12. febrúar 2007.

### Málsmeðferð:

Málið er kært með bréfi Hjördísar Halldórsdóttur hdl. hjá Logos lögmannaþjónustu f.h. Rannveigar Rist, forstjóra Alcan á Íslandi hf., með bréfi dags. 17. október 2007. Kærinni fylgir ljósrit af framangreindri umfjöllun, auk frekari gagna af sömu vefsíðu. Siðanefnd Blaðamannafélagsins fjallaði um málið á fundum þann 31. október og 5. og 20. nóvember 2007.

### Málavextir:

Að sögn lögmanns kæranda birti kærði hinn 12. febrúar 2007 á vefsíðu sinni eftirfarandi umfjöllun undir nafninu „þýska stálið“: „Stundum get ég verið hamingjusamur. Og bersýnileg eiturlyfjaneysla Rannveigar Rist, álfrúarinnar, gleður mig óendanlega mikið. Eða ég gef mér að hún sé undir áhrifum hennar vegna því annars daðrar hún líklega við að vera þroskaheft.“ Undir sömu færslu er að finna mynd af kæranda skera sneið af tertu. Í myndatexta segir orðrétt: „Álfrúin sker sér sneið af contalgen tertu.“

Kærandi telur ofangreinda umfjöllun brjóta gegn 2. gr. siðareglna Blaðamannafélags Íslands, en þar segir: „Blaðamanni er ljós persónuleg ábyrgð á öllu sem hann skrifar. Hann hefur í huga að almennt er litið á hann sem blaðamann þó að hann komi fram utan síns eiginlega starfssviðs, í riti eða ræðu“.

Í kærinni kemur fram að hið kærða efni birtist fyrst á umræddri bloggsíðu 12. febrúar 2007. Kæran er hins vegar dagsett 17. október. Miðað við fyrstu birtingu er kærufrestur því löngu útrunninn. Kærandi fór fram á undanþágu frá kærufresti enda hafi hann ekki vitað af umfjölluninni fyrr en 10. október. Þann dag var vísað til hennar í blogg færslu sem tengd var inn á frétt á vefsíðunni mbl.is.

Siðanefnd fellst ekki á þá röksemd kæranda að annað eigi við um birtingu á netinu en í hefðbundnum fjölmiðlum, enda eru flestir fjölmiðlar einnig aðgengilegir þar lengi eftir fyrstu birtingu. Hefðubundinn kærufrestur eigi því við um þetta mál.


Af þessu tilefni vill siðanefnd þó taka eftirfarandi fram: Framangreind kærð ummæli fela í sér dómgreindarskort. Hins vegar telur siðanefndin að ummælin séu sett fram

sem persónuleg skoðun eða tjáning kærða sem hann eigi lögverndaðan rétt til en beri einnig ábyrgð á. Verði hann að svara fyrir þau eftir atvikum, án þess að þau tengist beint störfum hans sem blaðamanns. Fjölmíðlar hljóti að hafa reglur sem taki á málum sem þessum, enda fer illa saman að skrifa hlutlægar fréttir á daginn um menn og málefni sem sami blaðamaður bloggar frjálsglega um á kvöldin á netinu.


**Niðurstaða:**

Máli þessu er vísað frá.

Reykjavík, 20. nóvember 2007



Hjörtur Gíslason



Jóhannes Tómasson



Brynhildur Ólafsdóttir



Salvör Nordal



Sigurveig Jónsdóttir